

藥物圖

楊華亭著

海立夫



中央國醫館
醫藥叢刊之一

藥物圖考卷四

編審委員楊華亭撰述
編審委員周柳亭校訂

黃耆

本草經

黃耆味甘微溫主癰疽久敗瘡排膿止痛大風癩疾五痔鼠瘻補虛小兒百病一名戴椹

名醫別錄

無毒婦人子藏風邪氣逐五臟間惡血補丈夫虛損五勞羸瘦止渴腹痛洩痢益氣利陰氣生白
水關四川松潘縣東境者冷補其（莖葉）療渴及筋攣癰腫疽瘡一名戴椹一名獨椹一名菱草一名蜀脂一名百本

生蜀郡山谷白水漢中二月十月採陰乾

陶弘景

第一出隴西洮陽

在甘肅臨潭縣西南

色黃白甜美今亦難得次用黑水宕昌

在甘肅岷縣南

者色白肌理粗新者亦甘溫

補又有蠶陵白水者色理勝蜀中者而冷補又有赤色者可作膏貼用消癰腫俗方多用道家不須

唐本草

此物葉似羊齒或如蕺藜獨莖或作叢生今出原州

今甘肅鎮原縣

及華原

今陝西耀縣

者最良蜀漢不復採用之

圖經本草

黃耆生蜀郡山谷白水漢中今河東陝西州郡多有之根長二三尺已來獨莖或叢生枝幹去地
二三寸其葉扶疎作羊齒狀又如蕺藜苗七月中開黃紫花其實作莢子長寸許八月中採根用其皮折之

如綿謂之綿黃耆然有數種有白水耆有赤水耆有木耆功用並同而力不及白水耆木耆短而理橫今人多以苜蓿根假作黃耆折皮亦似綿頗能亂真但苜蓿根堅而脆黃耆至柔韌皮微黃褐色肉中白色此爲異耳（下畧）

重廣補注神農本草

黃耆本出綿上者爲良故名綿黃耆非謂其柔韌如綿也今圖經所繪憲州者地與

綿上相隣也

華亭述言

【產地】

產於甘肅四川陝西等處

【形態】

豆科黃耆屬多年生草本葉互生羽狀複葉每小葉長橢圓形秋日由葉腋抽出花莖開唇形花冠色黃紫結實成莢長寸許其根長約二三尺徑約半寸外皮微黃內白心黃體柔軟

【主治】

入藥用根無毒無臭味甘主和氣血虛勞怯症失血虛脫漏汗鼠瘻痔瘡逐惡血消癰疽排膿止痛

【考證】

凡身無疾苦惟體虛易汗出者係氣排泄過度所致以黃耆服之可阻其過於排泄之弊所謂和氣固表之功也故於氣虛貧血者爲常用之藥本經主「癰疽久敗排膿止痛」蓋黃耆爲瘍科聖藥於瘡之初程紅腫而血液與肌肉未化膿時有阻炎止痛消腫之功如已化膿有速於攻破推陳致新之力若至末期有

免腐生肌之功在失血虛脫與瘍科均宜足分劑本經主「大風癰疾」即今之麻風此患頗難治愈而於主治之藥亦寥寥無幾本草補遺於大楓子條云「粗工治大風病佐以大楓子油」今西醫提淨其油以作注射麻風之用雖見其功然不能爲特效良藥本經黃耆是否有效未曾試驗然於他類瘡瘍實爲良藥藥徵云黃耆主「肌表之水故能治黃汗盜汗皮水又旁治身體腫」金匱用黃耆約七方傷寒論中無之而王好古云「治傷寒尺脈不至」究傷寒尺脈不至不知病竈現於何經以致尺脈不至而黃耆能醫之耶蓋金元之醫學多不究藥性好作玄虛圖經云「今人以苜蓿根假作黃耆」考苜蓿係二年生草其葉爲三小葉構成根細長一二尺微如黃耆根其質瘦而堅味苦黃耆體柔軟味甘爲異

【修治】

採於秋末洗去泥土切厚片陰乾收藏勿洩氣此藥易蛀李時珍云「槌扁以蜜炙數次以熟爲度亦有以鹽湯潤透蒸熟切用者」由斯則備要即云「入補中藥槌扁密炙達表生用」從新又云「入補中藥槌扁



密炙如欲其稍降鹽水炒一試問以密炙之即可改黃耆性之不行於表耶以鹽水炒之即能制其不升而降耶若如此則患虛症者須服蜜炙升症者須服鹽吾國醫藥學如前人妄語而後學不究即能隨聲附會良可慨矣

【分劑】煎服一至二兩

黃芩

本草經

黃芩味苦平主諸熱黃疸腸澼洩痢逐水下血閉惡瘡疽蝕火瘍一名腐腸

名醫別錄

大寒無毒療療熱胃中熱小腹絞痛消穀利小腸女子血閉淋露下血小兒腹痛一名空腸一名

內虛一名黃文一名經芩一名妒婦其子主腸澼膿血生秭歸今湖北
秭歸縣川谷及冤句三月三日採根陰乾

陶弘景

秭歸屬建平郡今第一出彭城鬱州亦有之圓者名子芩爲勝破者名宿芩其腹中皆爛故名腐腸惟

取深色堅實者爲好俗方多用道家不須

圖經本草

黃芩生稀歸山谷及冤句今川蜀河東陝西近郡皆有之苗長尺餘莖幹僂如筍葉從地四面作

叢生類紫草高一尺許亦有獨莖者葉細長青色兩兩相對六月開紫花根黃如知母匭細長四五寸二月

八月採根暴乾用之（下畧）

化學實驗新本草

（日本學說）黃芩漢醫頗珍重之稱爲有清涼解熱利尿之効猪子氏因漢醫珍重黃芩苦於不明其理由高橋學士發見一種結晶性物質附以（スクテリン）之名稱然於治療上無特殊之作用黃芩果爲有效與否暫時尙爲一疑問而已（中畧）和漢藥考用爲清涼解熱藥用量二、〇至六、〇

華亭述言

【產地】 產於山東河南等處

【形態】 唇形科黃芩屬多年生草本莖高尺許葉對生披針形無柄秋初枝端開唇形花冠色粉紫二強雄蕊雌蕊一枚總狀花序結實呈蓋果上殼如僧帽下殼如瓢秋末僧帽脫去惟瓢僅留枝上內含種子一至四粒

色藍黑小如粟米之半其根長尺許徑數分外皮棕黑內黃

【主治】 入藥用根無毒無臭味苦平主熱病肺炎痰盛膿黃清胃熱消食肝瘀血燥黃疸腸澼調經閉產後血癰

惡瘡火瘍紅腫

【考證】 陶氏以質堅未枯者名子芩綱目名條芩陶氏云破者名宿芩以內爛者名腐腸別錄名空腸李時珍名

片芩備要與從新名枯芩考黃芩破裂處皆在首段由破裂而內爛者多在中段其內未枯者多在中末二段蓋陶氏所名之子芩宿芩腐腸係一根有枯實之別非一株空者純空而實者純實也李東垣以片芩治肺火以條芩治大腸火備要與從新皆從其說實無聊之甚者也此藥總主清熱本經與別錄皆未嘗以枯實分別主治也若受邪熱於枝氣管炎致津液缺乏生膿黃之痰於方內重用黃芩半至一兩取效甚速故別錄首言「療痰熱」李時珍云「予年二十時因感冒欬嗽既久且犯戒遂病骨蒸發熱膚如火燎每日吐痰盈許暑月煩渴寢食幾廢六脈浮洪遍服紫胡麥門冬荆瀝諸藥月餘益劇皆以爲必死矣先君以黃芩一兩水二鐘煎一鐘頓服次日身熱盡退而痰皆愈」其說甚是東醫豬子氏云「漢醫珍重黃芩苦於不明其理由」考東醫所用分劑二至六瓦係五分二釐至一錢五分六釐如此微劑欲解極熱之症實如杯水車薪耳此藥無毒不妨重用黃芩治肝癰（肝變硬）頗效宜與硝砂鮮蒲公英大黃丹砂牛黃苦參等藥酌用此症初程肝之包膜下或見瘀斑門靜脈盈血則肝脉受壓結締組織增多其體消瘦故變硬此病多顯黃疸症本經黃芩主黃疸逐水下血閉故與肝變硬症用之有效此症初顯消化不良嘔血面皮微黃形容枯瘦目凹含淚鼻頰處之小靜脈顯擴張尿常少酸鹽多至重即患大腦症或驚呼或昏迷或譫語此症嗜酒者患之頗多治之宜早金匱用黃芩約十四方傷寒論約十五方

【修治】

採於春秋於鮮時洗去泥土於破裂處及中部枯朽處

以刀刮淨切厚片陰乾收藏勿洩氣若以乾質浸水中卽

變綠色故藥市皆入鍋煮之若煮時久亦變黑綠色張元

素云酒炒上行李時珍亦從其說并云以豬胆汁炒可瀉

肝胆火本草從新亦收入之余皆生用取效甚速

【分劑】

一錢至一兩

玉竹

本經名女萎爾雅名萎萎別錄名萎蕤

本草經

女萎味甘平主中風暴熱不能動搖跌筋結肉諸不足久服去面黑黧好顏色潤澤輕身不老

爾雅

萎萎註藥草也葉似竹大者如箭竿有節葉狹而長表白裏青根大如指長一二尺可啖

名醫別錄

萎蕤無毒主心腹結氣虛熱濕毒腰痛莖中寒及目痛胛爛淚出一名萎一名地節一名玉竹一



名馬薰生太山山谷及邱陵立春後採陰乾

陶弘景

按本經有女萎無萎蕤別錄無女萎有萎蕤而爲用正同疑女萎卽萎蕤也惟名異爾今處處有其根似黃精而小異服食家亦用之今市人別用一種物根形狀如續斷莖味不苦乃言是女青根出荊州今療下痢方多用女萎而北都有止洩之說疑必非也萎蕤又主理諸石人服石不調和者煮汁飲

圖經本草

萎蕤生太山山谷邱陵今滁州舒州及漢中皆有之葉狹而長表白裏青亦類黃精莖強直似竹筴有節根黃多鬚大如指長一二尺或云可噉三月開青花結圓實立春後採根陰乾用之本經與女萎同條云是一物二名又云自是二物苗蔓與功用全別爾雅謂萎萎郭璞註云藥草也亦無女萎之別名疑別是一物且本經中品又別有女萎條蘇恭云卽此女萎今本經朱書是女萎功效墨書是萎蕤之功觀古方書所用則似差別（下畧）

本草綱目

本經女萎乃爾雅萎蕤二字卽別錄萎蕤也上古鈔寫訛爲女萎爾古方治傷寒風虛用女萎者卽萎蕤也皆承本草之訛而稱之諸家不察因中品有女萎名字相同遂致費辨如此今正其誤只依別錄書萎蕤爲綱以便尋檢其治洩痢女萎乃蔓草也

華亭述言

【產地】 中國各地皆產

【形態】 百合科黃精屬多年生草本獨莖無棉高數寸至尺許萌芽時形如竹筍微扁可作茹食色綠白或微顯

褐色高至二寸餘外籜分裂其葉放出輪生無柄全緣並行脈由三至七小葉構成其花與葉同出由葉腋中心抽出細線之花莖長約一寸莖端分歧一至五花其花下垂如筒狀色粉綠頂端六裂雄蕊六枚花冠著生雌蕊一枚其花與葉之多少皆逐年數增加結實圓形爲漿果味甘畧辛大如桐子生青熟黑綠其葉與黃精畧異形如竹葉而厚其葉尖下捲葉表深綠背生白粉蠟質其根爲根莖色黃白粗如拇指長數寸至尺許亦有互生卵圓或橢圓葉者全緣並行脈由葉腋並生二花狀如輪生花其莖三稜

【主治】 入藥用根無毒無臭味甘主理氣血堅筋骨潤皮膚去面黑目痛背爛爲久服補虛之品非急治滅毒之

藥也常服以熬膏力大蓋丸散須焙乾爲末其質已耗故服之力減

【考證】 此藥本經名女萎卽萎與爾雅同名蓋女字卽萎字之誤寫也李當之本草有女萎爲蔓生植物（見

後圖）非玉竹爲輪生或互生之本立莖也綱目依別錄名萎蕤爲綱近世醫方多書玉竹亦別錄之又名故本書從之陶氏云「今市人別用一種物根形狀如續斷莖味不苦乃言是女青根出荊州今療下痢方多用女萎而北都有止洩之說疑必非也」此係李當之所言之女萎「主止下痢消食」唐本草主「洩

痢腸鳴」非本草經誤書女萎之主治也圖經云「葉挾而長表白裏青」按此藥葉類竹葉故一名玉竹非狹而長云表白裏青者當是表青裏白雷斅云「凡使勿用黃精並鉤吻二物相似」黃精葉類玉竹惟畧狹長而尖根粗如薑爲異鉤吻係蔓生葉如葛葉故一名野葛雷氏未睹鉤吻竟以黃精葉尖下捲者爲鉤吻（說見下黃精與鉤吻二條）不知玉竹葉尖亦下捲也新本草綱目萎蕤條云「春月抽莖粗大有三稜葉互生作淡綠色長橢圓形」玉竹有輪生互生二種入藥以輪生者爲上品互生者其莖三稜葉橢圓與輪生葉者迥異惟花與根相同（見後圖）余以此藥熬膏每日服二次至月餘有時尿道奇癢與樟腦之微激尿道作癢相似別錄主「莖中寒」卽此意而服者不可因受一時之奇癢卽生性交之心也

【修治】

採於春日苗芽時及秋日莖葉將枯時洗去泥土

暴乾收藏

【分劑】

煎服一至二兩

【玉竹膏】

春日萌芽採之搗碎入鍋熬爛過布淋酌加黃

酒熬至成膏爲度若無鮮質乾者亦可倘不加黃酒

卽不易久存分劑二至三錢



黃精

名醫別錄

黃精味甘平無毒主補中益氣除風濕安五臟久服輕身延年不飢一名重樓一名萑竹一名雞
 格一名救窮一名鹿竹生山谷二月採根陰乾

陶弘景

今處處有二月始生一枝多葉葉狀如竹而短根似萎蕤萎蕤根如荻根及菖蒲概節而平直黃精根
 如鬼臼黃連大節而不平雖燥並柔軟有脂俗方無用此而爲仙經所貴根葉華實皆可餌服酒散隨宜具



在斷穀方中黃精葉乃與鈎吻相似惟莖不紫花不黃爲異而人多惑之其類乃殊遂致死生之反亦爲奇事

唐本草

黃精肥地生者卽大如拳薄地生者猶如拇指萎蕤肥根頗類其小者肌理形色大都相似今以黃連鬼臼爲比殊無彷彿黃精葉似柳及龍胆徐長卿輩而堅其鈎吻蔓生殊非比類廣雅黃精龍御也

本草拾遺

黃精葉偏生不對者名偏精功用不如正精正精葉對生鈎吻乃野葛之別名二物殊不相似不

知陶公憑何說此

蜀本草圖經

鈎吻一名野葛陶說葉似黃精者當是蘇說葉似柿者當別是一物

圖經本草

黃精舊不載所出州土但云生山谷今南北皆有之以嵩山茅山者爲佳三月生苗高二三尺以來葉竹葉而短兩兩相對莖梗柔脆頗似桃枝本黃末赤四月開細青白花如小豆花狀子白如黍亦有無子者根如嫩生薑黃色二月採根蒸過暴乾用今通八月采山中八九蒸九暴作果黃黑色而甚甘美其苗初生時人多采爲菜茹謂之筆菜味極美江南人說黃精苗葉稍類鈎吻但鈎吻葉頭極尖而根細而蘇恭言鈎吻蔓生恐南北所產之異耳（下畧）

華亭述言

【產地】 中國南北皆產

【形態】 百合科黃精屬多年生草本獨莖無極高二三尺萌芽如竹筍色黃白採取可食俗名筆菜高至二寸餘

外籜分裂其葉與花同時放出輪生無柄由三至七小葉構成全緣並行脈葉表無光澤微如竹葉尖瘦而長葉尖下捲成圈亦有半捲成鈎狀者其花由葉腋中心抽出花莖細長約寸莖端分歧一至五花其花下垂如筒狀色粉綠頂端六裂雄蕊六枚花冠着生雌蕊一枚花與葉之多少皆逐年代增加結實如桐子生青熟黑綠爲漿果中含圓核色白其根爲根莖形畧似玉竹而粗短如薑

【主治】 入藥用根無毒無臭味甘其性與玉竹同子實味甘後辛

【考證】 黃精始於別錄玉竹始於本經二藥性味與輪生之形態相似係同屬之變種也雷斅云「凡使勿用鈎


吻眞似黃精只是葉有毛鈎子二箇是則認處誤服害人黃精葉似竹葉」陶弘景云「黃精乃與鈎吻相似惟莖不紫花不黃爲異」雷斅於鈎吻未睹竟臆度鈎吻有鈎陶氏不察亦附而演之由斯後世則以黃精葉尖下捲者爲鈎吻不知玉竹葉尖亦下捲也至唐蘇恭與陳藏器皆非其說蓋歷代本草辨物精審當以蘇陳二氏爲最韓保昇未見鈎吻而以陶說爲是吳其濬亦從雷陶二說（說見鈎吻條）予蒔養之玉竹與黃精葉尖皆下捲曾屢服之未嘗中毒陶弘景云「一枝多葉」陳氏云「正精葉對生」皆爲輪生

葉入藥有功陳氏云「偏生不對者名偏精功用不如正精」按玉竹之互生葉者余曾蒔養之惟黃精之互生葉者尚未目睹圖經云「鈎吻葉頭極尖而根細」此亦未見其形態妄爲欺人之語黃精入煎劑服者甚少因其非刺激性之救急抗毒藥若熬膏常服以爲補虛之用甚良

【修治】 採與修治均與玉竹同

【分劑】 與玉竹同

【黃精膏】 製法與分劑均與玉竹同



鈎吻

又名野葛又名胡蔓草又名斷腸草

本草經

鈎吻味辛溫主金瘡乳瘡中惡風欬逆上氣水腫殺鬼疰蠱毒一名野葛

名醫別錄

有大毒破癥積除脚膝痺痛四肢拘攣惡瘡疥蟲殺鳥獸折之青烟出者名固活甚熱不入湯生

傅高山谷及會稽屬浙江紹興縣東野

陶弘景

五符中亦云鈎吻是野葛言其入口則鈎人喉吻或言吻作挽字牽挽人腸而絕之覈事而言乃是兩

物野葛根狀如牡丹所生處亦有毒飛鳥不得集之今人用合膏服之無嫌鈎吻別是一草葉似黃精而莖紫當心抽花黃色初生極類黃精故以爲殺生之對也或云鈎吻是毛茛此本及後說參錯不同未詳定云何

唐本草

野葛生桂州以南村墟閭巷間皆有彼人通名鈎吻亦謂苗名鈎吻根名野葛蔓生人或誤食其葉者皆致死而羊食其苗大肥物有相伏如此若巴豆鼠食則肥也陶云飛鳥不得集之妄矣其野葛以時新採者皮白骨黃宿根似地骨嫩根如漢防已皮節斷者良正與白花藤根相類不深別者頗亦惑之其新取者折之無塵氣經年已後則有塵起根骨似枸杞有細孔者人折之則塵氣從孔中出經言折之青烟起者名

固活爲良此亦不達之言也且黃精直生如龍膽澤漆兩葉或四五葉相對鈎吻蔓生葉如柿葉博物志云鈎吻葉似鳧葵並非黃精之類毛萇是有毛石龍芮何干鈎吻

補筆談

鈎吻本草一名野葛主療甚多註釋者多端或云可入藥用或云有大毒食之殺人予嘗到閩中土人以野葛毒人及自殺或誤食者但半葉許入口卽死以流水服之毒尤速往往投杯已卒矣經官司勘鞠者極多灼然如此予嘗令人剝取一株觀之其草蔓生如葛其藤色赤節粗似鶴膝葉圓有尖如杏葉而光厚似枯葉三葉爲一枝如綠豆之類葉生節間皆相對花黃細戢戢然一如茴香花生於節葉之間酉陽雜俎言花似梔子稍大謬說也根皮亦赤閩人呼爲吻莽亦謂之野葛嶺南人謂之胡蔓俗謂斷腸草此草人間最毒之物不入藥用恐本草所出別是一物非此鈎吻也予見千金外台藥方中時有用野葛者特宜仔細不可取其名而誤用正如鰕鱖魚與鮓魚同謂之河狹不可不審也

植物名實圖考

鈎吻本經下品相承以爲卽治葛今之斷腸草也詢之閩廣人云有大小二種大者如夜來香葉蔓生植立近人輒動擣爛置豬腸中上下奔竄必破腸而出小葉者如馬蘭性尤烈（中畧）

（滇鈎吻）太陽之草曰黃精太陰之草曰鈎吻博物志云鈎吻盧氏曰陰地黃精不相連根苗獨生者是也陶隱居云葉似黃精而莖紫當心抽花黃色初生極類黃精雷斅曰使黃精勿用鈎吻眞相似只是葉有